



朱洪武个等路——收毋得

送人等路，無斯接受人个等路，全係歡喜个事情，但是，有人接受著人个等路，嘎食睡毋安，包尾，命嘎無忒。這實在係得人驚个事情啊！麼人个等路會分人心寒膽顫呢？該就係朱洪武个等路——收毋得，一收，命嘎收忒。

大家都知，臭頭皇帝朱元璋，又安到朱洪武，佢駕前一隻猛將常遇春，非常勇敢。在盡困難个采石磯之戰，斯為佢打下大明江山个基礎，從此以後，朱元璋一堵著麻煩事情，手地地無辦法解決个時節，斯會想著常遇春；共樣，在有豐沛好食个時節，也會想著佢。

有一擺，朱洪武請常遇春飲酒作樂，一直到星光半夜、酩酊飽醉，正放佢轉。朱元璋當惜這恁好个將軍，想愛送一等好个等路分佢，又毋知愛送麼个正好，尤其常將軍盡老實，斯知背痾痾，做到兩頭烏，麼个娛樂也無。別兜官員全部係大婆細姐，唯獨常將軍，屋下有一隻惡舖娘，使佢連細妹仔都毋敢睇一下，所以，朱元璋特別送佢兩隻靚靚个宮女，好服侍佢。

這使著，常遇春當尷尬，當為難。朱元璋係講得著，做得著个皇帝，係講毋接受，係違抗聖旨，性命怕會無忒；係講接受，愛仰般膠舖娘交代？

常遇春个舖娘，看著老公帶等兩個靚細妹仔轉來，當無歡喜。但是，這係皇帝个命令，佢一時也無辦法。不過，佢越想，火就越著，目攪攪仔，想看愛仰般來尋佢出水，偏偏老公又係一隻正人君子。哼！你係敢作怪，若祖婆係無分你銀銀鐺鐺正毋係人。

恁堵好，一日朝晨，兩隻宮女兜洗面水分常遇春洗面，愛膠面帕扭燥，衫袖攞起來，出現幼嫩白淨个玉手，常遇春斯當自然阿腦一句，講你个手還靚哦，無想著，嘎害著這兩隻宮女。等到常遇春退朝下班轉來，愛去尋厥舖娘个時節，侍女就兜來一份包裝著當好个等路，講係夫人送个。等佢打開一看，嚇著滿面瀝青，原來，該盒仔張个等路，就係宮女个雙手。常遇春傷心到講毋出話來。

常遇春受著這種打擊以後，心肝當慍悴，常常像無頭神共樣，上朝無精神，講話無元氣，皇帝感覺奇怪。等到皇帝了解情形以後，正經係龍顏大怒，拍桌拍凳，心肝頭想，這隻舖娘，無分佢教訓做毋得。

朱洪武安慰常遇春，毋使艱苦，你對恁忠誠，暗夜，你斯毋使轉咧，恁愛好好對你，爽快膠你飲酒，愛請你食從來毋識食个「人參鳳肉湯」，再飲幾杯「人參鳳肉酒」，來體會天下第一滋味，不醉不歸啊！。

正經係「無酒坐毋久，有酒變阿丑」，一醉解千愁，等到常遇春飲到酒醉摸些轉去，也毋知麼个時節咧，酒醒以後，使用人斯送上一盒等路，講係皇帝送个，打開一看，阿姆哀！原來係自家舖娘个頭那！正知所謂个「人參鳳肉」，就係自家个舖娘呢。

常遇春連續受著「等路」个刺激，想著該血流血著个雙手膠頭那，半夜都分惡夢嚇醒，斯恁樣迷迷癡癡，無神無神，過無幾久，正四十歲，就消忒咧。

朱洪武个等路，正經收毋得，收著，命嘎收忒。

作者：何石松

☆詞彙學習☆

【等路】den' lu+: 禮物。作客時餽贈的物品。【目攪攪仔】mug zhim' zhim' er: 不懷好意的看著。
 【背痾痾】boi' gu' gu': 形容彎腰曲背貌。【血流血著】hied liu hied chog': 形容血流很多的樣子。